



Per Berthelsen, Siumut  
/Maani

### **Pineqartoq.: Tuapannguani Napasuliaq 4-miit 7-imut – inatsisitigut tunngaviusoq**

16. december 2009  
Sagsnr. 2009-023474  
Dok. Nr. 276342

Tuapannguani napasuliaq 4-miit 7-imut pillugit apeqqutitit tiguakka, taakkunungalu aamma tunngatillugu suut inatsisitigut tunngavigineqarsimanersut apeqqutigineqarpoq.

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: [aan@gh.gl](mailto:aan@gh.gl)  
[www.nanoq.gl](http://www.nanoq.gl)

1. Inatsit suna atorlugu Naalakkersuisut aalajangerpat inissiatileqatigiiffik Tuapannguani napasuliaq 7-imi inissiat kingullit 30-it attartortunut pigisassanngortinneqassanngitsut?
2. Naalakkersuisut pilersaaruteqarpat inissiatileqatigiiffik Tuapannguani napasuliat 4 - 6 iniat attartortunut pigisassanngortinneqarnissaannik?
3. Naalakkersuisunit siunertaanerluni Namminersorlutik Oqartussat sulisui innuttaasunit allanit pitsaanerusumik immikkut pineqassasut, siulliullutik initaarsinnaanissaminnut periarfissaqartinneqarnermikkut piginneqatigiilluni inissiatileqatigiiffiup inissiaataasa inaataannut?
  - a. Inatsit suna atorlugu Namminersorlutik Oqartussat sulisui immikkut pitsaanerusumik pineqarpat?

#### **Apeqquut 1 pillugu:**

Inatsisitigut tunngavissaq, piginneqatigiilluni inissiatillit peqatigiiffianni Tuapannguit Napasuliaq 7-imi inissianut 30-inut kingullernut atorpeqartoq tassaavoq, Inatsisartut 2009-imut aningaasanut inatsisaanni konto pingaarneq 89.72.12, 2009-mi ilassutitut aningaasaliissuteqarnikkut allannguuteqartinneqartoq, tassanilu oqaasertaliussanut nassuiaatini allassimavoq, Napasuliaq 7-imi inissiat Inatsisartut Allattoqarfiannut attartortinneqassasut. Inissiat attartortumiit piginnittumut aaqqissuussineq, imaluunniit piginneqataasumiit piginnittumut aaqqissuussineq malillugu attartortunut tunniunneqarsinnaanngitsut nassuiaatini allassimavoq.

Taamaalliluni Inatsisartut aningaasanut inatsisaat tunngavigalugu inissiat attartortunut tunniunneqarsinnaanngillat.

#### **Apeqquut 2 pillugu:**

Tuapannguani napasuliaq 4-miit 6-imut inissiat attartortunut tunniunneqarnissaat Naalakkersuisut siunertarinngilaat. Tamannattaaq Inatsisartut aningaasanut inatsisaanni kontomut pingaarnermut oqaasertaliussat nassuiaatillu tunngavigalugit ajornartinneqarpoq.

**Apeqquut 3 pillugu:**

Tuapannguani napasuliaq 4-miit 6-imut inissiat Namminersorlutik Oqartussani sulisunut neqeroorutigineqarnerat immikkut salliutitsiniarnertut Naalakkersuisut isiginngilaat. Attartortuusimasut salliutillugit uternissaminnut neqeroorfigineqareersimanagerat tamatumunnga pissutaavoq. Uternissartik kissaatiginngippassuk attartortut allat utaqquisut allattorsimaffianni allatsissimasut Tuapannguani piginneqatigiilluni inissiamik tigusinissamik neqeroorfigineqartussaapput. Tamatuma kingorna inissianik attartortitsisarneq pillugu Inatsisartut peqqussutaanni kingusinnerusukkut allannguuteqartinneqartumi § 33 naapertorlugu namminersorluni inissianik attartortitsisarnermut nalinginnaasumut piumasaqaatit tunngavigalugit inissiat Namminersorlutik Oqartussani sulisunut attartortinneqarnissaat aalajangiunneqarpoq. Tassunga taarsiullugu piginneqatigiilluni inissiat inissiigallarfiusartussatut qitiusumik allaffeqarfimmut attartortinneqarsinnaapput

Aningaasarpassuit ukiut tamaasa inissianut inissiigallarnermut aammalu Namminersorlutik Oqartussani sulisunik inissiigallarnermut atorneqartarnerat tamatumunnga tunngavigineqarpoq. Napasuliaq 4-miit 7-imut piginneqatigiilluni inissiat Namminersorlutik Oqartussani sulisunut inissiatut attartortittakkatut atorneqarnerisigut aningaasat taakku ikilisinneqarsinnaapput.

**Apeqquut 3.a pillugu:**

Piginneqatigiilluni inissiat inissiatut attartortittakkatut Namminersorlutik Oqartussani sulisunut neqeroorutigineqartarnissaat immikkut salliutitsinertut Naalakkersuisut isiginngilaat.

Inatsisartut 2010-mut aningaasanut inatsisaata akuerineqarnera tunngavigalugu, Tuapannguani napasuliaq 4-miit 6-imut piginneqatigiilluni inissiat inissiatut attartortittakkatut neqeroorutigineqarnissaat ajornarunnaarsinneqarpoq.

Inussiarnersumik inuulluaqqusilluta

Jens B. Frederiksen